


南北朝文鈔

一









南北朝文鈔

(一)

彭兆蓀輯

# 序

夫詩崇正始。賦首麗則。凡厥文辭。貴求初軌。駢儷之製。何獨不然。元熙以前。體裁恂剝。未極神明。迨南北瓜分。自永初之元。迄開皇之季。中間世歷數禩。代挺雅材。摛藻敷華。珠零錦粲。夔乎莫之尙已。有唐而降。厥風漸頹。流及天水。古意浸微。幾鄰俳俗。後之作者。欲探源珠海。取法椎輪。舍南北朝。其奚適哉。吾友彭子甘亭。少學爲沈博絕麗之文。其持論也。甯蹇澁以違俗。勿軟滑以悖古。投跡高軌。棘棘不阿。間取有宋迄隋數朝文。博觀而慎擇之。除文選所已收。及庾徐不錄外。分體詮次。厘得百首。以爲學駢文者。制輪之寸轄。運關之尺樞。廩廩乎其操約而旨嚴也。嘉慶己未夏。聯襪金閫。縱言及此。予因參校一過。并錄甘亭原引。授之劄氏。韋莊有云。雖遺妍可惜。而備載斯難。是編也。聊以樹規植矩。使希雅音者。若射之有鵠焉。耳。苟謂攬翮剔毛。足翼選學。則是輕塵足岳。而隊露添流也。卽謂鴻律蟠采。道在于茲。則又以指測河而曰河盡也。嗚呼。慎矣。吳江徐達源山民氏序。

# 原引

六朝文爲偶語之左海。習駢儷而不胎息于此。庸音俗體。於古人固而存之之義何居焉。選樓以外。遺珠綦多。降自陳隋。不乏名製。暇時雜取南北史。文苑英華。藝文類聚。百三家集。四六法海。諸書。擇其文之尤工者。斷自永初。迄於大業。彙爲一集。題曰南北朝文鈔。攻選體者欲挽頽波而趨正軌。此編或藥俗之昌陽乎。至徐庾二集。固與選學同揭日月而行。茲不復列。且仿選詩家不收李杜例也。嘉慶己未仲春上澣。婁東彭兆蓀甘亭氏書於吳門寓齋。

南北朝文鈔目錄

卷上

與臧熹勅

梁武帝與謝朓勅

次建業詔

天嘉六年修前代墓詔

與劉孝儀令

與湘東王令

答勸進羣下令

永嘉郡教

豫章王拜後赦教

上讜言表

上新定法律表

申飭選人表

宋武帝

沈約

梁元帝

陳宣帝

梁簡文帝

梁簡文帝

梁元帝

邱遲

陸倕

蕭子良

孔稚圭

梁武帝

請徵補謝朓何胤表

薦鮑幾表

爲柳世隆讓封公表

爲韋雍州致仕表

經通天臺奏漢武帝表

勸進梁元帝第二表

爲陳六宮謝表

請開獻書表

爲晉安王謝南兗州章

修竹彈芭蕉文

上北伐圖疏

議給虜書疏

謝隨王賜紫梨啓

謝隨王賜左傳啓

謝資地圖啓

梁武帝

梁元帝

沈約

王僧孺

沈炯

沈炯

江總

牛宏

沈約

沈約

王融

王融

謝朓

謝朓

昭明太子



爲妾宏夜姝謝東宮賚合心花釵啓

謝東宮賚園啓

謝晉安王賜宜城酒啓

謝東宮賜宅啓

謝東宮賚米啓

謝東宮賚古跡啓

謝歷日啓

謝賚朱櫻啓

上魏書十志啓

答陸澄書

與從叔永書

登大雷岸與妹書

與尚書令王儉書

與荊州隱士劉虬書

與何胤論止殺書

梁元帝

張纘

劉孝儀

庾肩吾

庾肩吾

庾肩吾

庾肩吾

庾肩吾

魏收

王儉

張融

鮑照

張充

蕭子良

周顥

答陶宏景論書書二

梁武帝

與何胤書

昭太子

答湘東王求文集詩苑書

昭太子

與蕭臨川書

簡文帝

答徐摛書

簡文帝

答張纘謝示集書

簡文帝

答定襄侯餉臥簟書

簡文帝

答南平嗣王餉舞簟書

簡文帝

卷下

答蕭子雲上飛白書屏風書

簡文帝

答新渝侯和詩書

簡文帝

與湘東王論文書

簡文帝

答齊國餉雙馬書

梁元帝

與武陵王書

梁元帝

與蕭諮議等書

梁元帝

與友論隱書

與陶隱居書

答虞仲書

爲庾杲之與劉居士虬書

北使還與永豐書

答劉之遴借類苑書

與宋玉山元思書

爲衡山侯與婦書

與詹事江總書

復王少保書

與徐陵薦方圓書

與徐陵請王琳首書

爲王寬與婦義安主書

與徐僕射領軍述役僧書

與陽休之書

江淹

太真人

陶宏景

任昉

劉潛

劉峻

劉峻

何遜

陳后主

周宏讓

周宏讓

朱瑒

伏知道

釋真觀

祖鴻勳

上牛宏書

王孝籍

寄梁處士周宏讓書

王褒

遺崔躋書

豫章王暕

答豫章王書

崔躋

爲侯景叛移梁朝文

魏收

報應問

何承天

問律自序

張融

爲亮法師製涅槃經疏序

梁武帝

陶淵明集序

昭明太子

內典碑銘集林序

梁元帝

職貢圖序

梁元帝

全德志序

梁元帝

洞林序

梁元帝

昭明太子集序

劉孝綽

詩品序

鍾嶸

書品序

虎邱山序

河清頌

勞生論

餅說

凌煙樓銘

曇隆法師誄

褚先生伯玉碑

招真館碑

天光寺碑

常山公主碑

景明寺碑

大同哀詞

徵君何子皙先生墓志銘

共文一百編

庾肩吾

顧野王

鮑照

廬思道

吳均

鮑照

謝靈運

孔稚圭

梁簡文帝

陸倕

溫子昇

邢邵

簡文帝

簡文帝

# 南北朝文鈔卷上

清 婁東彭兆蓀甘亭採輯

## 與臧燾勅

宋武帝

頃學尙廢弛。後進積業。衡門之內。清風輟響。良由戎車屢警。禮樂中息。浮夫近志。情與事染。豈可不敷崇文籍。敦厲風尙。此境人士。子姪如林。明發搜訪。想聞令軌。然荆玉含寶。要俟開瑩。幽蘭懷馨。事資扇發。獨習寡悟。義著周典。今經師不遠。而赴業無聞。非惟志學者鮮。或是勸誘未至。耶。想復宏之。

釋名云。勅。飾也。漢制度曰。帝之下書有四。一策書。二制書。三詔書。四誡勅。細素雜記。謂唐以前帝王命令。尙未稱勅。謂千字文勅員外郎勅字。乃梁字。謬說也。源按南宋列傳。燾字德仁。東莞莒人。武敬皇后兄也。晉太元中。始立國學。舉燾爲助教。頃之去官。以母老家貧。與其弟熹。俱棄人事。躬耕自業。約己養親。十餘載。居喪以毀瘠著稱。服闋。除臨沂令。宋武帝義旂建。爲太學博士。參右將軍。何無忌軍事。隨府轉鎮南參軍。高祖鎮京口時。與燾此書。後徵拜太常。彌自冲約。茅屋蔬食。不改其舊。

## 梁武帝與謝朓勅

沈約

吾以菲德。屬當期運。鑒與吾賢。思隆治道。而明不遠燭。所蔽者多。實寄賢能。匡其寡闇。嘗謂山林之志。上所宜宏。激貪勵薄。義等爲政。自居元首。臨對百司。雖復執文經武。各修厥職。羣才競爽。以致和美。而鎮風

靜俗變教論道。自非箕穎高人。莫膺此寄。是用虛心側席。屬想清塵。不得不屈茲獨往。同此濡足。便望釋  
蘿襲裘。出野登朝。必不以湯有慙德。武未盡善。不降其身。不屈其志。使璧帛虛往。蒲輪空歸。傾首東路。望  
兼立表。義軒邈矣。古今殊事。不獲總駕。啞峒。依風問道。今方復引領雲臺。虛已宣室。紆賢之愧。載結寢興。  
肅字敬冲。莊之子。建武中。與何胤並徵不至。梁武初。再徵。亦不至。遣王果敦譬肅。肅謀于胤。胤給曰。興  
王之世。安可久處。肅遂出。以此頗失衆望。然肅初爲吳興太守。頗事聚斂。至以雞卵賦人。使終身不出。  
亦惡得爲高隱耶。

源按梁武本記。天監元年。徵肅爲左光祿大夫。開府儀同三司。此卽徵肅之勅。後肅詣闕自陳。詔授司  
徒尙書令。改中書監司徒衛將軍。五年卒。諡曰靖孝。

次建業詔

元帝

夫爰始居亳。不廢先王之都。受命于周。無改舊邦之頌。頃戎旃旣息。關柝無警。去魯興嘆。有感宵分。過沛  
殞涕。實勞夕寐。仍以瀟湘作亂。庸蜀阻兵。命將授律。指期克定。今八表乂清。四郊無壘。宜從青蓋之典。言  
歸白水之鄉。江湘委輸。方船連舳。巴峽舟艦。精甲百萬。先次建業。行實京師。然後六軍邁征。九旂揚旆。拜  
謁瑩陵。修復宗社。主者詳依舊典。以時宣力。

蓀按元帝卽位江陵。將都建業。以宗懷、黃羅漢所阻。不果行。此詔南史本紀不載。法海亦未收。於帝集  
中錄出之。

源按周書王褒傳云。元帝以建業彫殘。方須修復。江陵殷盛。便欲安之。領軍將軍胡僧佑。吏部尙書宗懷。太府卿黃羅漢。御史中丞劉毅等。俱言遷徙非宜。元帝深以爲然。南史亦載曩實吾意。宗黃何罪之言。可知元帝本無遷意也。此詔載在梁書本紀。宜從青蓋之典。典字。梁書作興。宣力史作宣勒。太寶三年詔云。以時宣勒。承聖二年詔云。外卽宣勒。屢見。

### 天嘉六年修前代墓詔

陳宣帝

梁室多故。旣亂相尋。兵甲紛紜。十年不解。不逞之徒。虐流生氣。無賴之屬。暴及徂魂。江左肇基。王者攸宅。金行水位之主。木運火德之君。時更四代。歲逾二百。若其經綸王業。縉紳民望。忠臣孝子。何世無才。而零落邱山。變移陵谷。咸皆翦伐。莫不侵殘。玉杯得於民間。漆簡傳於世載。無復五株之樹。罕見千年之表。自大祚光啓。恭惟揖讓。爰暨朕躬。聿修祖武。雖復旂旗服色。猶行杞宋之邦。車駕巡遊。眇瞻河洛之路。故喬山之祀。蘋藻弗虧。驪山之墳。松柏恆守。惟咸藩舊壠。士子故塋。掩殮未周。樵牧猶衆。或親屬流隸。負土無期。子孫冥滅。手植何寄。漢高流連於無忌。宋祖惆悵於子房。邱墓生哀。性靈共惻者也。朕所以興言永日。思慰幽泉。維前代王侯。自古忠烈。墳冢被發。絕無後者。可檢行修治。墓中樹木。勿得樵採。庶幽顯咸暢。稱朕意焉。

源按有陳受禪。及世祖高宗之世。詔策俱徐陵草之。此詔載在世祖文帝本紀。當亦出其手。

### 與劉孝儀令

梁簡文帝



賢從中庶。奄至殞逝。痛可言乎。其孝友淳深。立身貞固。內含玉潤。外表瀾清。美譽嘉聲。流於士友。言行相符。始終如一。文史該富。琬琰爲心。辭章博瞻。元黃成采。旣以鳴謙表性。又以難進自居。未嘗造請公卿。締交榮利。是以新沓莫之舉。杜武弗之知。自阮放之官。野王之職。栖遲門下。已逾五載。同僚已陟。後進多升。而怡然清靜。不以少多爲念。確爾之志。亦何易得。西河觀寶。東江獨步。書籍所載。必不是過。吾昔在漢南。連翩書記。及忝朱方。從容坐首。良辰美景。清風月夜。鷁舟乍動。朱鷺徐鳴。未嘗一日而不追隨。一時而不會遇。酒闌耳熱。言志賦詩。校覆忠賢。樵揚文史。益者三友。此實其人。及宏道下邑。未申善政。而能使民結去思。野多馴雉。此亦威鳳一羽。足以驗其五德。比在春坊。載獲申晤。博望無通寶之務。司成多節文之科。所願故人。時相媿偶。而此子溘然。實可嗟痛。惟與善人。此爲虛說。天之報施。豈若此乎。想卿痛悼之誠。亦當何已。往矣奈何。投筆惻愴。吾昨欲爲誌銘。并爲撰集。吾之劣薄。其生也不能揄揚吹歎。使得騁其才用。今者爲銘爲集。何益旣往。故爲痛惜之情不能已耳。

劉遵字孝陵。彭城安上里人。有學行。工文。晉安王爲太子。除中庶子。偏蒙寵遇。大同元年卒。太子悼惜之。因與遵從兄孝儀令。

蓀按駢體至梁而極盛。簡文諸製。尤美不勝收。茲編意取簡嚴。若上昭明集表。及元圃講頌。寶扇。賜裘。諸啓。概從割愛。猶之劉峻不錄山棲志。盧思道不錄甘露表。略舉一二。他可類推。

源按孝儀名潛。彭城安上里人。秘書監孝綽弟。時爲陽羨令。

與湘東王令

梁簡文帝

威明昨宵奄復殂化。甚可痛傷。其風韻逾上。神風標映。千里絕跡。百尺無枝。文辯縱橫。才學優贍。跌宕之情。彌遠。濠梁之氣。特多。斯實俊民也。一爾過隙。永歸長夜。金刀掩茫。長淮絕涸。去歲冬中。已傷劉子。今茲寒孟。復悼王生。俱往之傷。信非虛說。

王規字威明。劉子謂中庶子遵也。世說新語以簡文爲昭明書記。洞詮以遵爲孝綽。俱誤。  
源按王規傳具載此令。神風標映。本傳作神峰標映。

答勸進羣下令

元帝

孤以不德。天降之災。枕戈飲膽。扣心泣血。風樹之酷。萬始不追。霜露之哀。百憂總萃。甫聞伯升之禍。彌切仲謀之悲。若封豕旣殲。長蛇卽戮。方欲追延陵之逸軌。繼子臧之高讓。豈資秋亭之壇。安事繁陽之石。侯景項藉也。蕭棟殷辛也。赤泉未賞。劉邦尙曰漢王。白旗弗懸。周發猶稱太子。飛龍之位。孰謂可躋。附鳳之徒。旣開來議。羣公卿士。其諭孤之志無忽。

大寶二年。太宗崩。王僧辯累表勸卽尊位。世祖答讓。

永嘉郡教

邱遲

貴郡控帶山海。利兼水陸。實東南之沃壤。一都之巨會。而曝背拘牛。屢空於畎畝。績麻治絲。無間於甿巷。其有耕灌不修。桑榆靡樹。遨遊鄙里。酣酺卒歲。越伍乖鄰。流宕忘返。才異相如。而四壁獨立。高慙仲蔚。而

三徑沒人。雖謝文翁之正俗。庶幾龔遂之移風。

遲字希範。烏程人。靈鞠子也。武帝踐祚。出爲永嘉郡守。在郡不稱職。爲有司所糾。帝愛其才。寢其奏。

豫章王拜後赦教

陸倕

夫議獄緩死。著在令圖。疑罪惟輕。聞諸雅誥。是以虞經惻隱。流涕冬決。鍾意垂仁。哀矜寒送。吾以虛薄。夙頒寵章。光宅襟險。奄有全粵。非有沛獻矜嚴。空紆青組。東平智思。徒舉赤帷。思所以仰述皇猷。導揚宏澤。遵彼下車。譬茲解網。

按倕。齊梁間人。本傳不載。爲豫章官屬。齊豫章王嶷。嘗爲荊湘二州刺史。都督八州。帝因其病。爲之大赦。疑此時作也。

源按史。倕字佐公。吳郡吳人。父慧曉。字叔明。齊高帝輔政。除尙書殿中郎。建元初。遷太子洗馬。廬江何點。薦於豫章王嶷。補司空掾。甚加恩禮。子三僚。任倕。皆能文。時人謂之三陸。慧曉授兗州。三子依次作讓表。辭並雅麗。此文當亦慧曉令其代作。倕少好學。於宅內起兩茅屋。屏絕來往。晝夜讀書。如此數載。年十七。補本州秀才。刺史竟陵王子良。開西邸。延英俊。倕亦預焉。辟爲議曹從事參軍。與樂安任昉友善。爲感知己賦。後仕梁。遷太常卿。

上讜言表

蕭子良

前臺使督逋。切調恆聞。相望於道。及臣至郡。亦殊不踈。凡此輩使人。旣非詳慎勤順。或貪險崎嶇。要求此

役朝辭禁門情態卽異。暮宿村縣。威福便行。但今朱鼓裁完。鉞槩徵具。顧眄左右。叱咤自尊。攬宗斷族。排輕斥重。脅過津隸。恐喝傳郵。破岡水逆。商旅半引。逼令到下。先過己船。浙江風猛。公私畏渡。脫舫在前。驅令俱發。阿蹙行民。固其常理。侮折守宰。出變無窮。旣瞻郭望境。便飛下嚴符。但稱行臺。未顯所督。先訶疆寺。却攝羣曹。開亭正檣。便振荆革。其次絳標寸紙。一日數至。徵村切里。俄刻十催。四鄉所召。莫辯枉直。孩老士庶。具令付獄。或尺布之逋。曲以當匹。百錢餘稅。且增爲千。或誑應質。作尙方。寄繫東冶。萬姓駭迫。人不自固。遂漂衣敗力。競致兼漿。值今夕酒。諧肉飶。卽許附申。赦格明日。禮輕貸薄。便復不入恩科。筐黃微闕。篋撻肆情。風塵毀謗。隨忿而發。及其狃赫轉積。鷲粟漸盈。遠則分鬻他境。近則託質吏民。反請郡邑。助民繇緩。回刺言臺。推信在所。如聞頃者。令長守牧。離此每實。非復近歲。愚謂凡諸檢課。宜停遣使。密畿州郡。則指賜勅。遙外鎮宰。明下滌源。旣各奉別旨。人競自罄。雖復臺使盈湊。會取正屬所。徒相疑債。反更淹懈。凡預衣冠。荷恩盛世。多以闇緩貽僇。少爲欺猾入罪。若類以宰牧乖政。則觸事難委。不容課逋。上網偏覺。非才但賒促差降。各限一期。如乃事速應緩。自依違糾坐之。坐之之科。不必須重。但令必行。期在可肅。且兩裝之船。克擬千緒。三坊寡役。呼訂萬計。每一事之發。彌晨方辦。粗計近遠。率遣一部。職散人領。無減二十舟船所資。皆復稱是。長江萬里。費固倍之。較略一年。脫得省者。息船優役。實是不少。兼折姦減竊。遠近暫安。

彙按臺使之害。振古如斯。唐宋以來。厥風寢甚。讀此及建封傳中宮市諸弊。輒爲三嘆。

源按南宋孝武後徵求急速。以郡縣遲緩。遂遣臺使。自此公役勞擾。齊太祖踐祚。子良乃上此表。子良字雲英。武帝第二子。封竟陵王。少有清尚。禮才下士。與文惠太子同好釋氏。子良敬信尤篤。武帝不豫。遺詔使子良爲太傅。輔太孫西昌侯鸞。爲侍中尚書令。子良素仁厚。不樂時務。乃推西昌侯總理朝政。武帝遺詔曰。事無大小。悉與鸞參。懷子良所志也。隆昌元年薨。年僅三十有五。所著內外文筆數十卷。多勸戒語。

上新定法律表

孔稚圭

臣聞匠萬物者以繩墨爲正。馭大國者以法理爲本。是以古之聖王。臨朝思理。遠防邪萌。深杜姦漸。莫不資法理以成化。明刑賞以樹工者也。伏惟陛下。躡歷登皇。乘圖踐帝。天地更築。日月再張。五禮裂而復縫。六樂頽而爰緝。乃發德音。下明詔。降恤刑之文。申慎罰之典。敕臣與公卿入坐。共刪注律。謹奉聖旨。諮審司徒臣子良。稟受成規。創立條緒。使兼監臣宋躬。兼平臣王植等。鈔撰同異。定其去取。詳議入座。裁正大司馬臣嶷。其中洪疑大議。衆論相背者。聖照元覽。斷自天筆。始就成立律文二十卷。錄敍一卷。凡二十一卷。以今奏聞。請付外施用。宣下四海。臣又聞老子仲尼曰。古之聽獄者。求所以生之。今之聽獄者。求所以殺之。與其殺不辜。甯失有罪。是則斷獄之識。自古所難矣。今律文雖定。必須用之。用失其平。不異無律。律書精細。文約例廣。疑似相傾。故誤相亂。一乖其綱。枉濫橫起。法吏無解。旣多謬僻。監司不習。無以相斷。則法書徒明於帙裏。冤魂猶結於獄中。今府州郡縣。千有餘獄。如令一獄歲枉一人。則一年之中。枉死千餘。

矣。寃毒之死。上干和氣。聖明所急。不可不防。致此之繇。又非但律吏之咎。列邑之宰。亦亂其經。或以軍勳餘力。或以勞吏暮齒。獷情濁氣。忍并生靈。昏心狠態。吞剝氓物。虐理殘其命。曲文被其罪。寃積之興。復緣斯發。獄吏雖良。不能爲用。使于公哭於邊城。孝婦寃於遐外。陛下雖欲宥之。其已血濺九泉矣。尋古之名流。多有法學。故釋之定國。聲光漢臺。元帝文惠。績映魏閣。今之士子。莫肯爲業。縱有習者。世議所輕。良繇空勤永歲。不逢一朝之賞。積學當年。終爲閭伍所蚩。將恐此書。永墜下走之手矣。今若宏其爵賞。開其勸慕。課業官流。班習胥子。拔其精究。使處內局。閒其才良。以居外仕。方岳咸選其能。邑長竝擢其術。則臯繇之謀。指掌可致。杜鄭之業。鬱焉何遠。然後姦邪無所逃其刑。惡吏不能藏其詐。如身手之相驅。若絃栝之相接矣。臣以疎短。謬司大理。陛下發自聖衷。憂矜刑網。御延奉訓。遠照民瘼。臣謹仰述天官。伏奏雲陛。所奏繆允者。宜寫律上國學。置律助教。依五經例。國子生有欲讀者。策試上過高第。即便擢用。使處法職。以勸士流。

孫按此參議王植所定律章。當時竟陵王子良。下意多使從輕。故德璋此文。亦言言悱惻。

源按史所載明刑賞以樹功者也。工宜從功。公卿八坐。詳議八座。二句俱作八座。閒其才良。閒當作簡。

### 申飭選人表

梁武帝

臣聞以言取士。士節其言。以行取人。人竭其行。所謂才生於代。窮達惟時。而風流遂往。馳騫成俗。媒孽夸衒。利盡錐刀。遂使官人之門。肩摩轂擊。豈直暴蓋露冠。不避寒暑。遂乃戢屢杖策。風雨必至。良由鄉舉里

選不師古始。稱肉度骨。遺之管庫。加以山河梁畢。闕輿徵之恩。金張許史。忘舊業之替。吁可傷哉。且夫譖牒訛誤。詐僞多緒。人物雅俗。莫肯留心。是以冒襲良家。卽成冠族。妄修邊幅。便爲雅士。負俗深累。遽遭寵擢。墓木已拱。方被徽榮。故前代選官。皆立選簿。應在貫魚。自有銓次。胄籍升降。行能臧否。或素定懷抱。或得之輿論。故得簡通賓客。無事掃門。頃代陵夷。九流乖失。其有勇退忘進。懷質抱真者。選部或以未經朝謁。難於進用。或有晦善藏聲。自埋衡華。又以名不素著。絕其階緒。必須畫刺投狀。然後彈冠。則是驅迫廉。搗獎成澆競。愚謂自今選曹。宜精隱括。依舊立簿。使冠履無爽。名實不違。庶人識崖涖。造請自息。且聞中間立格。甲族以二十登仕。後門以過立試。吏求之愚懷。抑有未達。何者設官分職。惟才是務。若八元立年。居阜隸而見抑。四凶弱冠。處鼎族而宜甄。是則世祿之富。無意爲善。布衣之士。肆心爲惡。豈所以宏獎風流。希向後進。此實巨蠹。尤宜刊革。不然。將使周人有路傍之泣。晉臣興漁獵之歎。且俗長浮競。人寡退情。若限歲登朝。必增年就宦。故貌實昏童。籍已踰立。滓穢名教。於斯爲甚。臣總司內外。憂責是任。朝政得失。義不容隱。伏願陛下垂聖淑之姿。降聽覽之末。則彝倫自修。憲章惟允。

源按齊書和帝中興二年詔云。梁國初建。宜須綜理。可依舊選。諸要職悉依天朝之制。梁武時。封相國梁公。因上此表。

請徵補謝朓何胤表

武帝

夫窮則獨善。達以兼濟。雖出處之道。其揆不同。用捨惟時。賢哲是蹈。前新除侍中太子少傅朓。前新除散

騎常侍太子詹事都亭侯庠。羽儀世胄。徽猷冠冕。道業德聲。康濟雅俗。昔居朝列。素無宦情。賓客簡通。公卿罕預。簪紱未褫。而風塵擺落。且文宗儒肆。互居其長。清規雅裁。兼擅其美。並達照深識。預覩亂萌。見庸質之如初。知貽厥之無寄。拂衣東山。眇絕塵軌。雖解組昌運。實避昏時。家膺鼎食。而甘茲橡艾。世襲青紫。而安此懸鶉。自澆風肇扇。用南成俗。淳流素軌。餘烈頗存。誰其激貪。功歸有道。康俗振民。朝野一致。雖在江海。而勳同魏闕。今泰運甫開。賤貧爲耻。況乎久蘊瑚璉。暫厭承明。而可得求志海隅。永追松子。臣負荷殊重。參贊萬機。實賴羣才。共成棟幹。思挹清源。取鏡止水。愚欲屈居僚首。朝夕諮諏。庶足以翼宣寡薄。式是王庭。

人。源按梁高祖平京邑。進位相國。表請徵謝朓。何胤。爲軍諮祭酒。朓加後將軍。並不起。胤字子季。廬江灑

### 薦鮑幾表

元帝

臣聞思皇多士。仄陋所以明敷。疇咨熙載。髦俊所以竝作。斯固殷殿初基。拾龍淵之寶。虞祠始構。獻鳳管之玉。旌蒲出魯。賁帛歸齊。頌聲旣興。盛業斯在。伏惟陛下。則天緯地。乘正馭才。沙汰八風。登明六合。叶龜登夢之客。日賁於丘園。韋韞投釣之臣。相望於魏闕。故以物無遺寶矣。振鷺有充庭之謳。白駒罕空谷之詠。洋洋濟濟。無得而稱者焉。臣誠愧知才識。職非選舉。竊以進賢上賞。蔽賢顯戮。敢緣斯義。用舉所知。伏見鮑幾。門庭雍睦。立身貞退。博涉文史。頗嫻刀筆。忠公抗直。出宰廉平。雅志宏深。安貧專靜。解巾入仕。三



十餘年。自遊臣府。一紀于茲。前宰東邑。實有二魯之風。近處南臺。欲尊兩鮑之則。伏揆天嚴。已當簡在。脫蒙顯居良局。登以清貫。將齊毛玠古人之服。實同吳隱酌水之廉。昔丁隈牧州。陳顧翟之好禮。徐靖爲郡。薦袁渙之篤學。桓範驅傳。先舉管甯。朱則剖符。亦稱董直。臣才非往哲。識愧前修。輕塵聽覽。伏待斧鉞。

源按。幾字景元。東海人。元帝爲湘東王時。幾爲諮議參軍。

爲柳世隆讓封公表

沈約

臣聞懸旌玉塞。貳師尙黜其功。伐鼓炎州。伏波猶懼其賞。徒以兼委之施。或難固辭。抽心之情。必無雙奪。是故俛容青閣。願還慈於裂壤。竊步丹墀。希收寵於開賦。昔竄命窮雉。難迫勢孤。沈板未難。負戶非切。及顧溫靖之館。懼結尊慈之懷。累葉喁喁。舉門惴惴。臣事逼君親。理非外獎。實賴朝謨。謹肅。宰略遐震。奔鯨外剿。臣何力焉。幸得扶老攜幼。重出幽堵。還軸歸驂。再踐鄉路。豈可資國青以邀其功。因家勳而饗其報。遂使甘霜受電之心。有同於飾請。皎日大河之志。匪殊於貌謁。

世隆。元景之弟子。以破沈攸之功。封貞陽縣侯。齊高帝踐祚。進爵爲公。約。字休文。吳興武康人。初。梁武帝在西邸。與約有舊。建康平。引爲驃騎司馬。禪代之事。約首發之。帝卽位。約久處端揆。有志台司。而帝終不用。嘗夢齊和帝斷其舌。乃呼道士奏赤章于天。稱事不由已。帝聞。數譴責之。約懼而卒。有司請諡文。帝曰。懷清不盡。曰隱。故改爲隱。

源按。世隆。字彥緒。河東解人。性愛涉獵。啓太祖借秘閣書。上給三千卷。少立功名。晚喜清談。在朝不干

世務垂簾鼓琴。風韻清還。善卜能前知。卒諡忠武。

爲韋雍州致仕表

王僧孺

一旦攀附。遂無涯限。排雲矯漢。飛捧待翼。陸離蟬組。照灼旛旗。受脈推轂。執珪奉酎。變狹室於高門。改小冠於侯服。况復還周紐。其六印歸齊。列其五鼎。常懼輪輕載積。基薄墉高。器覆危傾。人指鬼瞰。老與年并。疾隨衰及。途遙齒截。漏迫鐘鳴。高春之景一斜。不周之風忽至。菌蠹夕陰。倏駛無幾。槿舜朝采。飄零已及。仰朱闕而掩涕。俯濠谷而自悲。豈復式瞻拱默。仰接鐘鼓。倘帷蓋未親。東岳稍駐。擊壤鼓腹。其賜猶多。蓀按韋叡佐命。蕭梁武帝卽位。封都梁子。天監中爲雍州刺史。史稱其羸而善戰。有韋虎之目。當崇信釋氏之代。獨不與衆俯仰。天監十五年。表致仕。優詔不許。名將中賢於有唐鄂國矣。

源按叡字懷文。京兆杜陵人。事繼母以孝聞。仕梁累著軍功。進爵爲侯。歷官所得。皆散之親故。卒諡曰嚴。僧孺東海郟人。於書無不覽。天監初。出爲南海太守。郡舊有陋政。僧孺歎曰。昔人爲蜀部長史。終身無蜀物。我欲遺子孫。甯在是。尋內擢兼御史中丞。僧孺幼時。其母嚮紗布。嘗攜以入市。道遇中丞鹵簿。驅迫溝中。及是日拜授。引騶清道。悲感不已。普通三年卒。

經通天臺奏漢武帝表

沈炯

臣聞橋山雖掩。鼎湖之竈可祠。有魯遂荒。大庭之跡無泯。伏惟陛下。降德猗蘭。纂靈豐谷。漢道旣登。神仙可望。射之罘於海浦。禮日觀而稱功。橫中流於汾河。指柏梁而高冥。何其甚樂。豈不然歟。旣而運屬上仙。

道窮宴駕。甲帳珠簾。一朝零落。茂陵玉盃。宛出人間。凌雲故基。共原田而靡靡。別風餘址。帶陵阜而茫茫。羈旅縲臣。能不落淚。昔承明既厭。嚴助東歸。駟馬可乘。長卿西反。恭聞故實。竊有愚心。黍稷非馨。敢望微福。但雀臺之弔。空愴魏君。雍邱之祠。未光夏后。瞻仰烟霞。伏增悽戀。

炯字初明。荊州陷。爲西魏所虜。以母老在東。恆思歸國。恐以文見留。有所作。輒秘不傳。嘗獨行經漢武通天臺。爲表奏之。陳己思歸之意。其夜夢至宮禁。兵衛甚嚴。便以陳訴。聞有人言。甚不惜放卿還。幾時可至。少日果與王克等並獲東歸。庾信、王褒惜而不遣。

源按陳書橋山雖掩橋。本傳作喬。鼎湖之竈。竈作靈。何其甚樂。作何其樂也。

勸進梁元帝第二表

沈炯

紫宸曠位。赤縣無主。百靈聳動。萬國回皇。雖醉醒相扶。同歸景毫。式歌且誦。總赴唐郊。猶懼陛下俛首潛然。讓德不嗣。傳車在道。方慎宋昌之謀。法駕已陳。尙杜耿純之勸。岳牧翹首。天民累息。臣聞星回日薄。擊雷鞭電者之謂天。岳立川流。吐霧蒸雲者之謂地。苞天地之混成。洞陰陽之不測。而以財成萬物者。其在聖人乎。故云天地之大德曰生。聖人之大寶曰位。黃屋廟堂之下。本非獲已而居。明鏡四衢之樽。蓋由應物取訓。伏惟陛下稽古文思。英雄特達。比以周旦。則文王之子。方之放勛。則帝摯之季。千年旦暮。可不在斯。庭闕湮亡。鍾鼎淪覆。嗣膺景歷。非陛下而誰。豈可使赤眉更立盆子。隗囂託置高廟。陛下方復從容高讓。用執謙光。展其矯行。僞書誣罔。正朔見機。而作斷可識矣。匪疑何卜。無待蓍龜。日者公卿失馭。禍纏霄

極。獯羯憑陵。姦臣互起。率戎伐顛。無處不然。勸明誅晉。側足皆爾。刁斗夜鳴。烽火相照。中朝人士。相顧銜悲。涼州義徒。東望殞涕。慄慄黔首。將欲安歸。陛下英略緯天。沉明內斷。橫劍泣血。枕戈嘗膽。農山圯下之策。金匱玉鼎之謀。莫不定算。展帷決勝。千里擊靈。鼙之鼓。而建翠華之旗。驅六州之兵。而總九伯之伐。四方雖虞。一戰以霸。斬其鯨鯢。旣章大戮。何校滅耳。莫匪姦回。史不絕書。府無虛月。自洞庭安波。彭蠡底定。文昭武穆。芳若椒蘭。敵國降城。和如親戚。九服同謀。百道俱進。國恥家怨。計期就雪。社稷不墜。繫在聖明。今也何時。而申帝啓之避。凶危若此。方陳泰伯之辭。國有具臣。誰敢奉詔。天下者高祖之天下。陛下者萬國之歡心。萬國豈可無君。高祖豈可廢祀。卽日五星夜聚。八風通吹。雲煙紛郁。日月光華。百官象物而動。軍政不戒而備。飛艦巨艦。竟水浮川。鐵馬銀鞍。陵山跨谷。英傑接踵。忠勇相顧。湛宗族以酬恩。焚妻子以報主。莫不覆楯銜威。提斧擊衆。風飛電耀。志滅凶醜。所待陛下昭告后土。虔奉上帝。廣發明詔。師出以名。五行夕返。六軍曉進。便當盡司寇之威。窮蚩尤之伐。報石趙而求璽。斬姚秦而取鐘。修掃瑩陵。奉近宗廟。陛下豈得不仰存國計。俯從民請。漢宣嗣位之後。卽遣蒲類之軍。光武登極。旣竟。始有長安之捷。由此言之。不無前准。臣等或世受朝恩。或身荷重遇。同休等戚。自國刑家。苟有腹心。敢以死奪。不任悽悽之至。謹重奉表以聞。

孫按初明勸進三表皆工。茲遴其一。已足與孝穆如騁之靳矣。

源按炯、吳興武康人。侯景將宋子仙、據吳興。召炯委以書記。炯辭以疾。子仙怒欲斬之。尋獲免。及子仙

爲王僧辯所敗。於軍中購得之。自是羽檄軍書。皆出其手。簡文遇害。四方岳牧。皆上表於江陵勸進。僧辯令炯製表。前後凡三上。俱載元帝本紀。奉近宗廟句。近史作迎。

爲陳六宮謝表

江總

鶴籥晨啓。雀斂曉映。恭承盛典。肅荷徽章。步動雲桂。香飄霧縠。媿纏豔粉。無情拂鏡。愁縈巧黛。息意臨窗。妾聞漢水贈珠。人間絕世。洛川拾翠。仙處無雙。或有風流行雨。窈窕初日。聲高一笑。價起兩環。乃可桂殿迎春。蘭房侍寵。借班姬之扇。未掩驚羞。假蔡琰之文。甯披悚戴。

藻按總持。歷仕梁陳。及爲令僕。日導後主宴遊。與陳暄、孔範、王瑳等。同爲狎客。以至於亡。乃其自序云。太建之時。權移羣小。諂嫉作威。屢被摧黜。夷言跖行。徒爲史籍所嗤耳。至若藻采葩流。則固豔詩宮體之祖也。

請開獻書表

牛宏

經籍所興。由來尙矣。爰畫肇於庖羲。文字生於倉頡。聖人所以宏宣教導。博通古今。揚於王庭。肆於時夏。故堯稱至聖。猶考古道而言。舜其大智。尙觀古人之象。周官外史。掌三皇五帝之書。及四方之志。武王問黃帝顓頊之道。太公曰在丹書。是知握符御歷。有國有家者。曷嘗不以詩書而爲教。因禮樂而成功也。昔周德旣衰。舊經紊棄。孔子以大聖之才。開素王之業。憲章祖述。制禮刊詩。正五始而修春秋。闡十翼而宏易道。治國立身。作範垂法。及秦皇馭寓。吞滅諸侯。任用威力。事不師古。始下焚書之令。行偶語之刑。先王

墳籍掃地皆盡。本既先亡。從而顛覆。臣以圖讖言之。經典盛衰。信有徵數。此則書之一厄也。漢興改秦之弊。敦尚儒術。建藏書之策。置校書之官。屋壁山巖。往往間出。外有太常太史之藏。內有延閣祕書之府。至孝成之世。亡逸尙多。遣謁者陳農。求遺書於天下。詔劉向父子。讎校篇籍。漢之典文。於斯爲盛。及王莽之末。長安兵起。宮室圖書。並從焚燼。此則書之二厄也。光武嗣興。尤重經誥。未及下車。先求文雅。於是鴻生鉅儒。繼踵而集。懷經負帙。不遠斯至。肅宗親臨講肄。和帝數幸書林。其蘭臺石室。鴻都東觀。祕牒填委。更倍於前。及孝獻移都。吏民擾亂。圖書縑帛。皆取爲帷囊。所收而西。裁七十餘乘。屬西京大亂。一時燔蕩。此則書之三厄也。魏文代漢。更集經典。皆藏在祕書內外三閣。遣祕書郎鄭默。刪定舊文。時之論者。美其朱紫有別。晉氏承之。文籍尤廣。晉祕書監荀勗。定魏內經。更著新簿。雖古文舊簡。猶云有缺。新章後錄。鳩集已多。足得恢宏正道。訓範當世。屬劉石憑陵。京華覆滅。朝章國典。從而失墜。此則書之四厄也。永嘉之後。寇竊競興。因河據洛。跨秦帶趙。論其建國立家。雖傳名號。憲章禮樂。寂滅無聞。劉裕平姚。收其圖籍。五經子史。纔四千卷。皆赤軸青紙。文字古拙。僭僞之盛。莫過二秦。以此而論。足可明矣。故知衣冠軌物。圖書記注。播遷之餘。皆歸江左。晉宋之際。學藝爲多。齊梁之間。經史彌盛。宋祕書丞王儉。依劉氏七略。撰爲七志。梁人阮孝緒。亦爲七錄。總其書數。三萬餘卷。及侯景渡江。破滅梁室。祕省經籍。雖從兵火。其文德殿內書史。宛然猶存。蕭繹據有江陵。遣將破平侯景。收文德之書。及公私典籍。重本七萬餘卷。悉送荊州。故江表圖書。因斯盡萃於釋矣。及周師入郢。釋悉焚之於外城。所收十纔一二。此則書之五厄也。後魏爰自幽方。

遷宅伊洛。日不暇給。經籍闕如。周氏創基關右。戎車未息。保定之始。書止八千。後加收集。方盈萬卷。高氏據有山東。初亦採訪。驗其本目。殘缺猶多。及東夏初平。獲其經史四部。重雜三萬餘卷。所益舊書五千而已。今御書單本。合一萬五千餘卷。部帙之間。仍有殘缺。比梁之舊目。止有其半。至於陰陽河洛之篇。醫方圖譜之說。彌復爲少。臣以經書自仲尼已後。迄于當今。年踰千載。數遭五厄。興集之期。屬膺聖世。伏惟陛下受天明命。君臨區宇。功無與二。德冠往初。自華夏分離。彝倫攸斁。其間雖霸王遞起。而世難未夷。欲崇儒業。時或未可。今土宇邁於三王。民黎盛於兩漢。有人有時。正在今日。方當大宏文教。納俗升平。而天下圖書。尙有遺逸。非所以仰協聖情。流訓無窮者也。臣史籍是司。寢興懷懼。昔陸賈奏漢祖云。天下不可馬上治之。故知經邦立政。在於典謨矣。爲國之本。莫此攸先。今祕藏見書。亦足披覽。但一時載籍。須令大備。不可王府所無。私家乃有。然士民殷雜。求訪難知。縱有知者。多懷慙惜。必須勒之以天威。引之以微利。若猥發明詔。兼開購賞。則異典必臻。觀閣斯積。重道之風。超於前世。不亦善乎。伏願天鑒。少垂昭察。

蓀按李諤革文華書未足起衰適形飢馱故舍彼取此

爲晉安王謝南兗州章 沈約

臣以萊孱。幼無秀業。依天宅照。藉海憑瀾。王爵早加。藩麾夙樹。進不能閑詩西楚。好禮北河。退無以振采。六條宣風。萬里懷慙。起懼載溢。心顏而皇。明輝燭照。被彌遠。遂乃徒旆淮區。遷金濟服。朱驂出邸。青組臨方。瞻惟徵寵。俯仰無厝。

王志堅曰此等文本無大異。但以秀潤勝人。後人雖極力求勝而不可得。

### 修竹彈甘蔗文

沈約

渭川長兼淇園貞幹。臣修竹稽首。臣聞芟夷蘊崇。農夫之善法。無使滋蔓。翦惡之良圖。未有蠹苗害稼。不加窮伐者也。切尋蘇臺前甘蔗一叢。宿漸雲露。荏苒歲月。擢本盈尋。垂蔭合丈。階緣寵渥。鈴衛百卉。而與奪乖賞。高下在心。每叨天功。以爲己力。風聞籍聽。非復一途。猶謂愛憎異說。所以挂乎嚴網。今月某日。有臺西階澤蘭萱草到園同訴。自稱雖慙杞梓。頗異蒿蓬。陽景所臨。由來無隔。今月某日。巫岫歛雲。秦樓開照。乾光宏普。罔幽不矚。而甘蔗攢莖布影。獨見鄣蔽。雖處臺隅。遂同幽谷。臣謂偏辭難信。敢察以情。登攝甘蔗。左近杜若。江蘿。依源辨覆。兩草各處。異削同款。既有證據。羌非風聞。切尋甘蔗。出自藥草。本無芬馥之香。柯條之任。非有松柏。後凋之心。蓋闕葵藿。傾陽之識。憑藉慶會。稽絕倫等。而得人之譽。靡卽稱平之聲。寂寞。遂使言樹之草。亡憂之用。莫施無絕之芳。當門之弊。斯在。妨賢敗政。孰過於此。而不除戮。憲章安用。請以見事。徒根翦葉。斥出臺外。庶懲彼將來。謝此衆屈。

蓀按此文雖近俳諧。然較議鮒賦蚤。尙稱雅令。後世毛穎羅文諸傳。實於此濫觴。

### 上北伐圖疏

王融

臣聞情愔自中。事符則感。象構於始。機動斯彰。莊敬之道。可宗。會揖讓其彌肅。勇烈之士。足貴。應鞞鐸以增思。肇植生民。厥詳旣緬。降及興運。維道有徵。莫不有所因循。而升皇業者也。若夫膏腴旣稱。天乙知五。



方之富。皮幣已列。帝劉測四海之尊。異封禪之文。則升中之典。攸啓。歎興地之圖。乃席捲之庸。是立伏惟。陛下窮神盡聖。總極居中。偶化兩儀。均明二曜。拯元綱於頽絕。反至道於澆淳。可謂區宇儀刑。齊民先覺者也。臣亦遭逢。生此嘉運。鑿飲畊食。自幸唐年。而識用昏蠹。經術疎淺。將邁且軸。豈蔽與薇。皇鑒燭幽。天高聽下。賞片言之或善。矜一物之失時。湍拂塵蒙。霑飾光價。拔足草廬。廁身朝序。復得拜賀歲時。瞻望日月。於臣心願。會已畢矣。但千祀一逢。休明難再。思策鉛鴛。樂陳涓瑤。竊習戰陳。攻守之術。農桑牧藝之書。申商韓墨之權。伊周孔孟之道。常願待詔朱闕。俯對青蒲。請閒宴之私。談當世之務。位賤人微。徒深傾款。方今九服清怡。三靈和宴。木有附枝。輪無異轍。東鞮獻舞。南辨傳歌。羌焚踰山。秦屠越海。舌象翫委體之勤。翰譯厭瞻巡之數。固將開桂林於鳳山。創金城於西守。而蠢爾獯狄。敢讐大邦。假息關河。竊命函谷。淪故京之爽塏。變舊邑而荒涼。息反玷之儒衣。久伊川之被髮。北地殘民。東都遺老。莫不茹泣吞悲。傾耳戴目。翹心仁政。延首王風。若試馳咫尺之書。具甄戎旅之卒。徇其墜城。納其降虜。可弗勞弦鏃。無待干戈。真皇王之兵。征而不戰者也。臣乞以執爻先邁。式道中原。澄瀚渚之恆流。掃狼山之積霧。係單于之頸。屈左賢之膝。習呼韓之舊儀。拜鑾輿之巡幸。然後天移雲動。勤封岱宗。咸五登三。追蹤七十。百神肅警。萬國具僚。瓊弁星離。玉帛雲聚。集三燭於蘭席。聆萬歲之正聲。豈不盛哉。豈不肆哉。昔桓公志在伐莒。郭牙審其幽趣。魏后心存去漢。德祖究其深言。臣愚昧忤誠。不足以知微。然伏揆聖心。規模宏遠。旣圖載其事。必克就其功。臣不勝歡喜。

蓀按舉世偷安江左甯朔此表尙有封狼居胥意雖其言未必克踐固足振元嘉以來喪師頽廢之風矣史臣以終軍賈誼比之非過獎也

源按融字元長琅邪臨沂人永明末世祖欲北伐使毛惠秀畫漢武北伐圖使融掌其事因上此疏會已畢矣句會史作會勤封岱宗勤當作勒

議給虜書疏

王融

臣側聞僉議疑給虜書如臣愚情切有未喻夫虜人面獸心狼猛蜂毒暴悖天經虧違地義逋竄獨幽去來幽朔綿周漢而不悛歷晉宋其踰梗豈有愛敬仁智恭讓廉修慙犬馬之馴心同鷹虎之反目設橐秣有儲筋竿足用必以草竊關燧寇擾邊疆甯容款塞卑辭承衣請朔陛下務存遵養不時侮亡許其膜拜之誠納裘之靈况復願同文軌儻見款遣思奉聲教方致猜拒將使舊邑遺逸未知所寘衰胡餘燠或能自推一令蔓草難鉏涓流泛酌豈直疥癢輕痾容爲心腹重患抑孫武之言也因則數罰窘則多賞先暴而後畏其衆者虜之謂乎前中原士庶雖淪懼殊俗至於婚葬之晨猶巾構爲禮而禁令苛刻動加誅轆于時獯粥初遷犬羊尙結卽心徒怨困懼成逃自其將卒奔離資峙銷闕北畏勅蠕西逼南胡民背如崩勢絕防斷於是曲從物情僞竊章服歷年將緇隱蔽無聞旣南向而泣者日夜以凱北顧而辭者江淮相屬凶謀歲寤淺慮無方於是稽顙郊門問禮求樂若來之以文德賜之以副書漢家軌儀重臨畿輔司隸傳節復入關河無待八百之師不期十萬之衆固其提漿佇俟揮戈願倒三秦大同六漢一統又虜前後

奉使不專漢人。必介以匈奴。備諸規獲。且設官分職。彌見其情。抑退舊苗。扶任種戚。師保則后族。馮晉國。總錄則邽姓。直勒渴。俟台鼎。則邱顏苟仁。端執政。則目凌鉗耳。至於東都羽儀。西京簪帶。崔孝伯。程虞蚪。久在著作。李元和。郭季祐。上于中書。李思冲。飾虜清官。游明根。泛居顯職。今經典遠被。詩史北流。馮李之徒。必欲遵尙。直勒等類。居致乖阻。何則。匈奴以氍騎爲帷牀。馳射爲餼糧。冠方帽。則犯沙陵雪。服左袵。則風驪鳥逝。若衣以朱裳。戴之元冕。節其揖讓。教以翔趨。必同艱桎梏。等懼冰淵。婆娑躑躅。困而不能前。已及夫春草水生。阻散馬之適。秋風木落。絕驅禽之歡。息沸唇於桑墟。別醍乳於冀俗。聽韶雅如聾。曠臨方丈。若爰居。馮李之徒。固得志矣。虜之凶族。其如病何。於是風土之思深。愎戾之情動。拂衣者運裾。抽鋒者比鏃。部落爭於下。曾渠危於上。我一舉而兼吞。卞莊之勢必也。且棘寶薦虞。晉疆彌盛。大鍾出智。宿氏以亡。帝略遠孚。無思不服。鑾光幸岱。匪暮斯朝。臣請收籍伊瀍。茲書復掌。猶取之內府。藏之外藏。於理有愜。卽事何損。若狂言足探。請決敕施行。

虜遣使求書。朝議欲不許。融上疏請許之。

謝隨王賜紫梨啓

謝朓

味出靈關之陰。旨珍玉津之澂。豈徒真定歸美。大谷慙滋。將恐帝臺妙棠。安期靈棗。不得孤擅玉盤。獨甘仙席。雖秦君傳器。漢后推餐。望古可儔。於今何答。

蓀按元輝爲齊隨王子隆鎮西功曹。子隆好辭賦。朓尤被賞。及除新安記室。作牋辭王。妙絕千古。已登

選樓。此與謝賜左傳啓。蓋正其爲功曹文學時也。

源按隨王名子隆。字雲興。世祖第八子。能文。以才貌爲人所憚。眺字元暉。陳郡陽夏人。好學。有美名。文章清麗。在隨邸流連。不捨日夕。累遷至尙書吏部郎。被議。死於獄。

謝隨王賜左傳啓

謝眺

昭晰殺青。近發中汗。恩勸挾冊。慈勗下帷。眺未睹山笥。早惜河籍。業謝專門。說非章句。庶得旣困而學。括羽瑩其蒙心。家藏賜書。竄金遺其貽厥。披覽神勝。吟諷知厚。

謝勅賚地圖啓

昭明太子

漢氏輿地。形茲未擬。晉代方丈。比此非妙。匹之長樂。惟畫古賢。儔之未央。止圖將帥。未有洞該八藪。混觀六合。域中天外。指掌可求。地角河源。戶庭不出。豈問千秋。自識烏丸之地。脫逢壯武。方著博物之書。

蓀按唐呂衡州集。有唐李該地志圖序。以爲乾象坤勢。炳焉可觀。殆與此啓所言。同爲括地諸書之嚆矢。而唐藝文志已不載其書。惜哉。

源按昭明太子名統。字德施。小字維摩。高祖長子。孝謹天至。精於義學。引納才士。賞愛無倦。天監元年立爲皇太子。年三十一薨。諡昭明。

爲妾宏夜姝謝東宮賚合心花釵啓

元帝

未得投壺。先應含笑。不因鸞鳳。自能歌舞。夜姝昔往陽臺。雖逢四照。曾遊澧浦。慣識九衢。未有仍代爵釵。

還勝翠羽飾以南金。裝茲麗玉。修靡夫人。本分章華之裏。中山孺子。獨荷春宮之恩。有志當熊。無期投閣。

謝東宮賚園啓

張纘

性愛山泉。頗樂閒曠。雖復伏膺堯門。情存魏闕。至於一邱一壑。自譚出處無辨。常願卜居幽僻。屏避喧塵。傍山臨流。而郊負郭。依林結宇。憩桃李之夏陰。對鏡開軒。採橘柚之秋實。而王畿陸海。畝號一金。涇渭土膏。豪傑所競。徙居好時。必待使越之裝。別館河陽。亦資牧荆之富。此園左帶平湖。修陂千頃。右臨長薄。清潭百仞。前逼逸陌。朝夕爽塏之容。後望鍾阜。表裏烟霞之氣。每贖春迎夏。華卉競發。背林向冬。雲物澄霽。窺瞰戶牖。不異登臨。升降階墀。已窮歷覽。舟楫所屆。累日不能究其源。魚鳥之豐。山澤不能喻其美。

纘字伯緒。尚武帝女富陽公主。博學多通。與元帝爲布衣交。後爲岳陽王擘所殺。性貪婪。貨賄填積。元帝皆收之。以粽蜜之屬還其家。

源按纘范陽方城人。負才任氣。吳興吳規。頗有才學。爲邵陵王綸禮遇。纘於綸席見規。忽舉杯曰。吳規。此酒慶汝。得陪今宴。規尋起還家。其子翁孺。聞之氣結。便卒。規恨纘痛子。憤哭致殞。妻翌日亦亡。時人謂張纘一杯酒。殺吳氏三人。其輕傲皆此類。不得令終宜矣。

謝晉安王賜宜城酒啓

劉孝儀

歲暮不聊。在陰卽慘。惟斯二理。總萃一時。少府鬪猴。莫能致笑。大夫落雉。不足解顏。或值餅瀉椒芳。壺開玉液。漢罇莫過。殷杯未逢。方平醉而遁仙。羲和耽而廢職。仰憑殊途。便申私飲。未矚壘恥。已觀幘岸。傾耳

求音不聞。霆擊澄神，密眊豈覲。山高愈疾，消憂於斯。已驗遺榮，忽賤卽事。不欺酩酊之中，猶知刻銘。源按簡文爲晉安王時，出鎮襄陽，引孝儀爲安北功曹史，孝儀幼孤，與其兄孝綽相勵勤學，並工文。人寬厚，尤敦內行，第二兄孝能早卒，孝儀事寡嫂甚謹，家中巨細必先咨決，與妻子朝夕供事，未嘗禮世，以此甚稱之。

謝東宮賜宅啓

庾肩吾

肩吾居異道南，才非巷北，流寓建春之外，寄息靈臺之下。豈望地無湫隘，里號乘軒，巷轉旛旗，門容幘。況乃交垂五柳，若元亮之居，夾植雙槐，似安仁之縣，却瞻鍾阜，前枕洛橋，池通西舍之流，銜映東鄰之來歸。高里翻成待封之門，夜坐書臺，非復通燈之壁，才下應王禮，加溫阮官成名立，無事非恩。肩吾字慎之，爲高齋學士之一。

源按梁書肩吾又字子慎，新野人，簡文爲太子時，引爲東宮通事舍人，開文德省，置學士，與其子信、海、徐、摛父子，吳郡張長公、北地傅宏、東海鮑至等，皆充其選。及簡文卽位，以肩吾爲度支尙書，後歷州刺史、義陽太守，封武康侯。

謝東宮賚米啓

庾肩吾

漁水鳴蟬，香聞七里，瓊山合顙，租歸十縣。某人慙振藻，徒降雲間之松，職濫更繁，空散家承之俸。成珠地，事重逢仙，遊玉爲糧，珍躡入楚，雖復激水滄流，不待監河之說，春風掃地，方謂文學之篇。

謝東宮賚古跡啓

庾肩吾

竊以仙巖遺傳。入握成塵。孔壁藏文。隨開已蠹。石書乍暗。廚畫猶飛。豈有跡經四代。年逾十紀。芝英雲氣之巧。未損松鉛。鵠反鸞驚之勢。不侵蒲竹。必使酒肆人來。池流色變。將損此海之牘。還代西河之簡。

謝歷日啓

庾肩吾

凌渠所奏。弦望旣符。鄧平之言。鎔銖皆合。登臺視朔。睹雲物之必書。拂管移灰。識權衡之有度。初開卷始。暫謂春留。未覽篇終。便傷冬及。徘徊厚渥。比日爲年。

蓀按齊東野語。載日歷隱謎云。都來一尺長。上面都是節。兩頭非常冷。中間非常熱。此雖俚諺。婦稚皆知。實乃脫胎此文卷始篇終四語也。

謝賚朱櫻啓

庾肩吾

成叢殿側。猶連製賦之條。結實西園。非復粘蟬之樹。異合浦之歸來。疑藏朱實。同秦人之逐彈。似得金丸。

上魏書十志啓

魏 收

臣收等啓。昔子長命世偉才。孟堅冠時特秀。憲章前詰。裁勒墳史。紀傳之間。申以書志。緒言餘迹。可得而聞。叔峻刪緝。後劉紹統。削撰季漢十志。實範遷固。表蓋闕焉。曹氏一代之籍。了無具體。典午終世之筆。罕云周洽。假復事播四夷。盜聽間有。小道俗言。要奇好異。考之雅舊。咸乖實錄。自永嘉喪圯。中原淆然。偏僞小書。殆無可取。魏有天下。跨蹤前載。順未克讓。善始令終。陛下極聖窮神。奉天屈己。願盼百皇。指掌萬世。

深存有魏撫運之業。永念神州人倫之緒。臣等肅奉明詔。刊著魏籍。編紀次傳。備聞天旨。竊謂志之爲網羅遺逸。載紀不可。附傳非宜。理切必在甄明。事重尤應標著。搜獵上下。總括代終。置之衆篇之後。一天人之迹。褊心末職。輒在於此。是以晚始撰錄。彌歷炎涼。採舊增新。今乃斷筆。時移世易。理不刻船。登舍毫論。敍殊致。河溝往時之切。釋老當今之重。藝文前志。可尋官氏。魏代之急。去彼取此。敢率愚心。謹十志二十卷。請續於傳末。并前例目合一百三十一卷。臣等妨官秉筆。迄無可採。塵黷旒冕。墮深冰谷。啓。

孫按史例井然。殊未可以穢少之。

### 答陸澄書

王儉

易體微遠。實貫羣籍。施孟異聞。周韓殊旨。豈可專據小王。便爲該備。一作輔依舊存鄭。高同來說。元凱注超邁前儒。若不列學官。其可廢矣。賈氏注經。世所罕習。穀梁小書。無俟兩注。存糜略范。率由舊式。凡此義。並同雅論。疑孝經非鄭所注。僕以此書明百行之首。實人倫所先。七略藝文。並陳之六藝。不與蒼頡將之流也。鄭注虛實。前代不嫌。意謂可安。仍舊立置。

孫按宰相通經術。明典禮。自漢代韋匡而外。如仲寶者鮮矣。此書與經義問答諸作。俱六朝僅見之源。按澄字彥淵。吳郡人。永明時。國學置鄭王易。杜服春秋。何氏公羊。糜氏穀梁。鄭元孝經。澄以孝經學之類。不宜列在帝典。作書與王儉論之。儉因答書。儉字仲寶。琅邪臨沂人。襲爵豫甯侯。幼有神彩。



心篤學。手不釋卷。尚陽羨公主。拜駙馬都尉。歷官至尚書僕射。寡嗜欲。惟以經國爲務。車馬樸素。家無遺財。長於禮學。諳究朝儀。每博議。證引先儒。罕有其例。八座丞郎。無能異者。嘗謂人曰。江左風流宰相。唯有謝安。蓋以自喻也。年三十八卒。諡曰文憲。

與從叔永書

張融

融昔稱幼學。早訓家風。雖則不敏。率以成性。布衣葦帶。弱年所安。簞食瓢飲。不覺不樂。但世業清貧。民生多待。榛栗棗修。女贄旣長。束帛禽鳥。男禮已備。勉身就官。十年七仕。不欲代耕。何至此事。昔者三吳一丞。雖屢舛錯。今聞南康缺守。願得爲之。融不知階級。階級亦可不知。融政以求丞不得。所以求郡。求郡不得。亦可復求丞。

菘按一乞祿書耳。而鄙夷不屑之態自在。史稱其風止詭越。信然。

源按永字景雲。於宋後廢帝元徽二年。爲征北將軍。尋以兵潰發病卒。融字思光。吳郡吳人。本傳載與從叔征北將軍永書。此書當作於元徽二年也。又按融先爲新安王北中郎參軍。出爲封溪令。後還京師。舉秀才。對策中第。爲尚書殿中郎。不就。爲儀曹郎。免官。尋復位攝祠倉部二曹領事。尋兼掌廚正。自表解職。爲安成王撫軍倉曹參軍。轉南陽王友。皆在元徽之前。所謂十年七仕。具見於此。昔者三吳一丞。史作昔求三吳一丞。雖屢舛錯。屢當作屬。

登大雷岸與妹書

大雷在舒州望江縣。

鮑照

吾自發寒雨。全行日少。加秋潦浩汗。山溪猥至。渡沂無邊。險徑游歷。棧石星飯。結荷水宿。旅客貧辛。波路壯闊。始以今日食時。僅及大雷。塗登千里。日踰十晨。嚴霜慘節。悲風斷肌。去親爲客。如何如何。向因涉頓。憑觀川陸。邀神清渚。流睇方曠。東顧五州之隔。西眺九派之分。窺地門之絕景。望天際之孤雲。長圖大念。隱心者久矣。南則積山萬狀。爭氣負高。含霞飲景。參差代雄。凌跨長隴。前後相屬。帶天有匝。橫地無窮。東則砥原遠隰。亡端靡際。寒蓬夕卷。古樹雲平。旋風四起。思鳥羣歸。靜聽無聞。極視不見。北則陂池潛演。湖脉通連。苧蒿攸積。菰蘆所繁。栖波之鳥。水化之蟲。智吞愚強。捕小號噪。驚聒紛物。其中西則迴江永指。長波天合。滔滔何窮。漫漫安極。創古迄今。舳艫相接。思盡波濤。悲滿潭壑。煙歸八表。終爲野塵。而是注集。長寫不測。修靈浩盪。知其何故哉。西南望廬山。又特驚異。基壓江湖。峰與辰漢連接。上常積雲霞。雕錦繡。若華夕曜。巖澤氣通。傳明散綵。赫似絳天。左右青竊。表裏紫霄。從嶺而上。氣盡金光。半山以下。純爲黛色。信可以神居帝郊。鎮控湘漢者也。若濛洞所積。溪壑所射。鼓怒之所厝擊。湧瀆之所宕滌。則上窮荻浦。下至獮州。南薄鷲爪。北極雷澗。削長埤短。可數百里。其中騰波觸天。高浪灌日。吞吐百川。寫泄萬壑。輕煙不流。華鼎振滂。溺草朱靡。洪漣隴壑。散渙長驚。電透箭疾。窮溢崩聚。坻飛嶺覆。回沫冠山。奔濤空谷。礎石爲之摧碎。碕岸爲之鑿落。仰視大火。俯聽波聲。愁魄脅息。心驚慄矣。至於繁化殊育。詭質怪章。則有江鵝海鴨。魚鮫水虎之類。豚首象鼻。芒鬚針尾之族。石蟹土蚌。燕箕雀蛤之儔。折甲曲牙。逆鱗返舌之屬。掩沙漲。被草渚。浴雨排風。吹澇弄翻。夕景欲沈。曉霧將合。孤鶴寒嘯。游鴻遠吟。樵蘇一嘆。舟子再泣。誠足悲憂。不可

說也。風吹雷颺。夜戒前路。下弦內外。望達所屆。寒暑難適。汝專自慎。夙夜戒護。勿我爲念。恐欲知之。聊書所觀。臨塗草蹙。辭意不周。

明遠妹名令暉。有文才能詩。見鍾嶸詩品。明遠嘗答孝武云。臣妹才自亞左芬。臣才不及太冲耳。

晉有大雷戍。陳置大雷郡。庾亮報溫嶠書。無過雷池一步。卽此。

蓀按古秀在骨。士龍答車茂安書。吳均與朱元思書。均不逮也。能彷彿其造句者。水經注而外。惟柳州小記近之。

源按結荷水宿。一作荷衣水宿。削長埤短。埤一作裨。

與尙書令王儉書

張充

吳國男子張充。致書於琅玕王君侯侍者。頃日路長。愁霖韜晦。涼暑未平。想無虧攝。充幸以漁釣之間。鎌採之暇。時復以卷軸自娛。逍遙前史。從橫萬古。動默之路。多端紛綸。百年升降之徒。不一。故以圓行方止。用之異也。金剛水柔。性之別也。善御性者。不違金石之質。善爲器者。不易方圓之用。所以北海挂簪帶之高。河南降璽言之貴。充生平少偶。不以利欲干懷。三十六年。差得以棲貧自澹。介然之志。峭聳霜厓。確乎之情。峯橫海岸。影纓天閣。既謝廊廟之華。綴組雲臺。終慙衣冠之秀。所以擯跡江臯。徜徉隴畔者。實由氣岸疎疑。情塗狷隔。獨師懷抱。不見許於俗人。孤秀神崖。每遭回於斯世。故君山直上。蹙壓於當年。叔陽靈舉。輾轆乎千載。充所以長羣魚鳥。畢影松阿。半頃之田。足以輸稅。五畝之宅。樹以桑麻。嘯歌於川澤之間。

諷詠於澗池之上。汎濫於漁父之游。偃息於卜居之下。如此而已。充何識焉。若夫驚巖罩日。壯海逢天。竦石崩尋。分危落仞。桂蘭綺靡。叢雜於山陰。松柏森幽。相繚於澗曲。元卿於是乎不歸。伯休亦以茲長往。若乃飛竿釣渚。濯足滄州。獨浪烟霞。高臥風月。悠悠琴酒。岫遠誰來。灼灼文談。空罷方寸。不覺鬱然千里。路阻江川。每至西風。何嘗不眷。聊因疾隙。略舉諸襟。持此片言。輕枉高聽。丈人歲路未強。學優而仕。道佐蒼生。功橫海望。入廟則協長倩之歲。出議則抗仲子之節。可謂盛德維時。孤松獨秀者也。素履未詳。斯旅尙眇。茂陵之彥。望冠蓋而長懷。霸山之氓。佇衣車而聳歎。得無惜乎。若鴻裝撰御。鶴駕軒空。則岸不辭枯。山被其潤。奇禽異羽。或崑際而逢迎。弱霧輕煙。乍林端而菴藹。東都不足奇。南山豈爲貴。充昆西之百姓。岱表之一民。蠶而衣。畊且食。不能事王侯。覓知己。造時人。騁游說。蓬轉於屠博之間。其歡甚矣。丈人早遇承華。中逢崇禮。肆上之眷。望溢於早辰。鄉下之言。謬延於造次。然舉世皆謂充爲狂。充亦何能與諸君道之哉。是以披聞見。掃心胸。述平生。論語默。所以通夢交魂。推衿送抱者。其惟丈人而已。關山疊阻。誓罷莫因。儻遇樵者。妄塵執事。

充字延符。緒之子。少好逸游。緒嘗歸至吳。逢充獵。右臂鷹。左牽狗。遇緒船至。放繮脫鞵。拜于水次。緒曰。一身兩役。無乃勞乎。充跪曰。充聞三十而立。今充二十九矣。請至來歲。及明年。便修改。多所該通。歷尙書殿中郎。時尙書令王儉。方聚親賓。充縠巾葛帔。言論放逸。至便求酒。及聞武帝欲以緒爲尙書僕射。儉執不可。充慍與儉書云云。儉以書示緒。緒杖之百。御史中丞到摛奏免官。久之爲司徒諮議參軍。遷

義興太守爲政清靜。梁臺建以爲大司馬諮議參軍。天監初爲吏部尙書。居選以平允稱。遷國子祭酒。登臺講說。皇太子皆出聽。出爲吳郡太守。下車卹貧老。故舊莫不欣悅。卒諡曰穆。

源按此書異同之本頗多。用之異也。用當作器。嘯歌於川澤之間。諷詠於澗池之上。二語。南史作雖復。玉沒於訪珪之辰。桂掩於搜芳之日。琢句尤工。又金石之質。石當作水。若乃飛竿釣渚。若乃當作至於。

與荊州隱士劉虬書

蕭子良

王燭登年。金商在律。炎涼始貿。動靜惟安。勤味道腴。幸遵雅尙。豈不樂哉。僕誠幸甚。百姓一心。衆生不疾。比屋可封。將又何求。但良書獨擁。善談無析。願言之子。實瘳我心。所以不遠千里。尺書道意。自淳清旣辨。澆漓代襲。隱顯之術參差。默語之途紛互。或飾智以警愚。或激情以悟俗。或穢己以闡通。或謬歌以明道。屠羊馭馬。未足磷其堅。祥狂如愚。豈能緇其白。官楚蕃魏。人外之氣逾邈。入漢遊梁。區中之韻彌少。及權其輕重。品其得失。則淵懷洞賞。甯或符之。僕夙養閒襟。長慕出槩。迹塵珪組。心逸江湖。未面自親。聞風如舊。而迴駕之念徒軫。式閭之禮無階。固已佇軸深衷。傾筐遐路者矣。君矯然獨遠。確乎難拔。素志與白雲同悠。高情與青松共爽。宣習質文。緇林枯而重葳。昭辨空有。連河壅而復滔。所謂忘言之人。可論天人之際。豈能鳳舉鶴翻。有心儀萃。高踰愛海。比策禪衢。沾濠射之冥游。屈祇鷺之法侶。闡三乘於窮子。發二諦於困蒙。有是因也。何其暢歟。今皇風具穆。至道被宏。四海不溢。五嶽無塵。膠序肇修。經法敷廣。人賤璣璜。家習禮讓。樵蘇必時。郊林全鬱。罽綱有節。鱗羽偕翔。至於層山絕澗。環帶幾畝。膏田沃野。亘望無纏。信可

以招往隱淪。栖集勝寄。故文舉築室冶城之阿。次宗植木西山之麓。葛洪考槃於海岫。釋遠肥遁於鍾幽。每踐其遺蹤。輒深九原之嘆。若高步可遷。復可懷乎四子。昔宣尼之見伯雪。師利之往維摩。豈不知相忘之道哉。良有以也。未敍之間。爲道自愛一二。令陵琚之口具。

源按南齊書。虬字靈禎。一字德明。南陽涅陽人。永明三年。詔徵爲通直郎。不起。子良因作此書通意。虬答謝。精信釋氏。衣粗布衣。長齋禮佛。注法華經。徙居江陵之西沙洲。恆斷穀。餌木及胡麻。建武二年。徵國子博士。仍不出。其年冬。示微疾卒之日。有白雲徘徊檐戶間。又有香氣馨聲之異。

與何詹論止殺書

周顯

丈人所以未極遐蹈。惑在於不全菜耶。挫折之升鼎俎。網罟之興載冊。其來實遠。誰敢干議。觀聖人之設膳羞。乃復爲之品節。蓋以茹毛飲血。與生民共始。縱而勿裁。將無崖畔。善爲士者。豈不以恕己爲懷。是各靜封疆。罔相陵轢。況乃變之大者。莫過死生。生之所重。無過性命。性命之於彼極切。滋味之於我可除。而終身朝晡。資之以永歲。彼就怨酷。莫能自伸。我業長久。吁哉可畏。且區區微卵。脆薄易矜。歇彼弱鷹。顧步宜愍。觀其飲啄飛忱。使人憐悼。況可甘心撲擗。加復恣意吞嚼。乃至野牧成羣。間象重圈。量肉揣毛。以俟支剝。如土委地。僉謂常理。可爲愴息。事豈一途。若云三世理誣。則幸矣。良快。如使此道果然。而受形未息。一往一來。生死常事。雜報如家人。天如客。過客日少。在家日多。吾修信業。未足常免。則傷心之慘。行亦自念。丈人於血氣之類。雖不身殘。至於晨晷夜鯉。不能不取備屠門。財貝之一經盜手。猶爲廉士所棄。生性

之一啓鸞刀。甯復慈心所忍。騶虞雖飢。非自死之草不食。聞其風。豈不使人多愧恥。

此書載顛本傳。問象重圈。問史作閉。末句豈不使人多愧。無恥字。

源按顛字彥倫。汝南安城人。清貧寡欲。終日長蔬食。文惠太子嘗問菜食何味最勝。彥倫曰。春初早韭。秋末晚菘。時何胤侈於味。食必方丈。後稍欲去其甚者。猶食白魚。鮓脯糖蟹。彥倫作書勸其菜食。胤末年遂絕血味。此書字句與史多有不同。末句下。史尙有衆生之稟。此形質。以畜醜一。皆由其積壅癡迷。沈流莫反。報受穢濁。歷苦酸長。此甘與肥。皆無明之報聚也。何至復引此滋腴。自汙腸胃。丈人得此有素。聊復片言發起耳。等句。後子季山居戒殺。有虞人逐鹿。鹿徑來趨子季。伏而不動。並有異鳥如鶴。紅色。集講堂。馴狎如家禽。又按彥倫音辭辨麗。長於佛理。明帝好談元。嘗引入殿內宿直。見所爲慘毒。彥倫不敢顯諫。輒誦經中因緣罪福事。帝亦爲之小止。

答陶宏景論書書二

梁武帝

又省別疏云。故當宜微以著賞。此旣勝事。雖風訓非嫌。然非所習。聊試略言。夫運筆邪則無芒角。執手寬則書緩弱。點掣短則法臃腫。點擊長則法離澌。畫促則字橫。畫疎則字形慢。拘則乏勢。放又少則。純骨無媚。純肉無力。少墨浮澁。多墨笨鈍。比並皆然。任意所之。自然之理也。若抑揚得所。趣舍無違。隨筆廉斷。觸勢峯鬱。揚波折節。中規合矩。分間下注。濃纖有方。肥瘦相和。骨力相稱。婉婉矍矍。視之不足。稜稜凜凜。常有生氣。適眼合心。便爲甲科。衆家可識。亦當復貫串耳。六義可工。亦當復由習耳。一聞能持。一見能記。且

古且今不無其人。大抵爲論終歸是習。程邈所以能變書體爲之舊也。張芝所以能善書工學之積也。既舊且積。方可以肆其談。吾少來乃至不能嘗畫甲子。無論於篇紙。老而言之。亦復何謂。正足見嗤於當今。貽笑於後代。遂有獨冠之言。覽之背熱。隱真於是乎。累真矣。此直一藝之精。非吾所謂勝事。此道心之塵。非吾所謂無欲也。

孫按帝論書書凡四篇。此尤古雅。紀謂草隸尺牘。莫不奇妙。可於此論徵之。

### 與何詹書

昭明太子

園公道勝。漢盈屈節。春卿明經。孝莊北面。況乃義兼乎此。而顧揆不肖哉。但經途千里。眇焉莫因。何嘗不夢姑胥而鬱陶。想具區而杼軸。心往形留。於茲有年載矣。方今朱明在謝。清風戒寒。想攝養得宜。與時休適。耽精義。味元理。息囂塵。玩泉石。激揚碩學。誘接後進。志與秋天競高。理與春泉爭溢。樂可言乎。樂可言乎。豈與口饜芻豢。耳聆絲竹者之娛。同年語哉。方今泰階端平。天下無事。修日養疾。差得從容。每鑽閱六經。汎濫百氏。研尋物理。顧略清言。旣以自慰。且以自警。而才性有限。思力匪長。熱疾憤其神。風眩弊其體。多慙過目。釋卷便忘。是以蒙求之懷。於茲彌軫。

孫按諸本於茲彌軫下。尙有聊遣典書陳顯宗。申其蘊結。想敬缺宜。此豈盡意。十八字。今坊間四六法海本無之。豈以其不可句讀故耶。

### 答湘東王求文集詩苑書

昭明太子



得疏。知須詩苑英華。及諸文製。發函伸紙。閱覽無輟。雖事涉烏有。義異等倫。而清新卓爾。殊爲佳作。夫文典則累野。麗則傷浮。能麗而不浮。典而不野。文質彬彬。有君子之致。吾嘗欲爲之。但恨未遑耳。觀汝諸文。殊與意會。至於此書。彌見其美。遠兼邃古。傍槩典墳。學以聚益。居焉可賞。吾少好斯文。迄茲無倦。談經之暇。斷務之餘。陟龍樓而靜拱。掩鶴關而高臥。與其飽食終日。甯游思於文林。或日因陽春。具物韶麗。樹花發鶯鳴和。春泉生。暄風至。陶嘉月而熙游。藉芳草而眺矚。或朱炎受謝。白藏紀時。玉露夕流。金風時扇。悟秋士之心。登高而遠託。或夏條可結。倦於邑而屬詞。冬雪千里。覩紛霏而興詠。密親離則手爲心使。昆弟宴則墨以歡露。又愛賢之情。與時而篤。冀同市駿。庶匪畏龍。不追子晉。而事似洛濱之游。多愧子桓。而興同漳川之賞。漾舟元圃。必集應阮之儔。徐輪博望。亦招龍淵之侶。校覈仁義。源本山川。旨酒盈壘。嘉肴益俎。曜靈旣隱。繼之以朗月。高春旣夕。申之以清夜。並命連篇。在茲彌博。又往年因暇。搜採英華。上下數十年。未易詳悉。猶有遺恨。而其書已傳。雖未爲精覈。亦忖足諷覽。集乃不工。而並作多麗。汝旣須之。皆遣送也。某啓。

太子嘗使劉孝綽撰錄文集爲十卷。隋經籍志云。古今詩英華十九卷。梁昭明太子撰。

孫按姚察書本傳稱。太子所著文集二十卷。又撰古今典誥文言。爲正序十卷。五言詩之善者。爲文章英華二十卷。文選三十卷。與隋志所載小異。當以姚書及南史爲準。

零雨送秋。輕寒迎節。江楓曉落。林葉初黃。登舟已積。殊足勞止。解維金闕。定在河日。八區內侍。厭直御之廬。九棘外府。且息官曹之務。應分竹南川。剖符千里。但黑水初旋。未申十千之飲。桂宮既啓。復乖雙之宴。文雅縱橫。卽事分阻。清夜西園。眇然未尅。想征艫而結歡。望桂席而霑衿。若使宏農書疏。脫還鄴河南口。占儻歸鄉里。必遲青泥之封。且觀朱明之詩。白雲在天。蒼波無極。瞻之岐路。眷慨良深。愛護波敬勗光彩。

源按梁書、蘭陵蕭子雲本傳、以祕書郎遷太子舍人、中大通元年、轉太府卿、三年出爲臨川內史、簡此書疑是贈別子雲之作。

### 答徐摛書

簡文帝

山濤有言。東宮養德而已。但今與古殊。時有監撫之務。竟不能黜邪進善。少助國章。獻可替不。仰禕聖以此慙惶。無忘夕惕。驅馳五嶺。在戎十年。險阻艱難。備更之矣。觀夫全軀具臣。刀筆小吏。未嘗識山川形勢。介冑之勤勞。細民之疾苦。風俗之嗜好。高閣之閒可來。高門之地徒重。玉饌羅前。黃金在握。泥營斯容。與自憙。亦復義軒以來。一人而已。使人見此。良足長嘆。

孫按昭明稱帝所作。謂首尾裁淨似指。此稱文而言。

源按摛字士秀。一字士績。東海郟人。博覽經史。屬文好變易舊格。爲晉安王諮議。王總戎北侵。以摛甯蠻府長史。參贊戎政。教命軍書。多出其手。及王入爲皇太子。轉家令。兼掌管記。尋帶領直。後侯景

陷臺城。簡文嗣位。被閉。搗不獲朝謁。感氣憤卒。諡曰貞。

答張纘謝示集書

簡文帝

網好文章。於今二十五載矣。竊嘗論之。日月參辰。火龍黼黻。尙且著於元象。章乎人事。而況文辭可止。詠歌可輟乎。不爲壯夫。揚雄實小言破道。非謂君子。曹植亦小辨破言。論之科刑。罪在不赦。至如春庭落景。轉蕙承風。秋雨且晴。簷梧初下。浮雲生野。明月入樓。時命親賓。乍動嚴駕。車渠屢酌。鸚鵡驟傾。伊昔三邊。久留四戰。胡霧連天。征旗拂日。時聞塢笛。遙聽塞笳。或鄉思悽然。或雄心憤薄。是以沈吟短翰。補綴庸音。寓目寫心。因事而作。

答定襄侯餉臥篋書

簡文帝

筠篋多品。篠簜雜名。校色比奇。獨此爲貴。自含蒼紫。似久暴於柯亭。乍舒黝素。若屢沾於湖水。三伏餘炎。九折成用。便可旅食南館。高臥北窗。

源按定襄侯名祗。字敬謨。南平元襄王偉子。少有令譽。爲皇太子愛賞。

答南平嗣王餉舞篋書

簡文帝

濯龍之木。文闕飾壇。淮南之臺。紫羅爲薦。未若五離九折。出桃枝之翠筍。綺爛霞舒。制雲母之修竹。南湘點淚。喻此未奇。東宮赤花。擬之非妙。

源按南平嗣王名恪。字敬則。宏雅有風則。姿容端麗。少年卽出爲雍州刺史。未閑庶事。悉委羣下。百姓

每通一詞。必數處輸錢方得達。時有江仲舉、蔡遠、王臺卿、庾仲雍四人俱被禮接。民間歌曰：江千萬。五百王新車。庾大宅。遂達武帝。帝爲續曰：主人憤憤不如客。尋召還。帝以民間歌問之。恪大慚。不敢一語。後折節學問。所歷以善政稱。